

Iluarsiissut**Akissuteqaat imm. 169 20.10.2025-meersut taarserpai****(UKA2025/169-mut tunngatillugit oqaatsinik erseqqissaasoqarpoq)**

Naartunermi, erninermi meeravissiaartaarnermilu sulinngiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-ini, siornatigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allannngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens NapâtôK', Naleraq)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Siunnersuuteqartumut, Jens NapâtôK', Naleraq, qujanaq.

Meeqqat angerlarsimaffimminni toqqissisimanartuni piffissaqarnerulernerannik periarfissiisumik paaqqinnittarfinnullu ilungersoreersunik oqilisaassinisaaq pillugu, angajoqqaanut atugassarititaasut ilaasa qulakkeerneqarnissaasa pingaaruteqassusaa Naalakkersuisut naalakkersuisoqatigiinnissamik isumaqatigiissutiminni tikkuarpaat. Taamaammat anguniagaq taanna tunaartaralugu Naalakkersuisut inatsit atuuttoq misissussamaarpaat.

Siunnersuummi siunertarineqartumik Naalakkersuisut isumaqataapput, matumani meeqqat tamarmik sapinngisamik pitsaanerpaamik inuunermik aallartitsinissaannik, angajoqqaanngorlaallu meeqqap inoorlaajunerani isumassornissaanut pisariaqartunik tunngavissaqarnissaannut.

Naligiissitaanermik isiginninnikkut inuusutissarsiummik ingerlataqartunut anaanaasunullu angerlarsimaannartunut erninermusiaqarsinnaanerannut inatsisip atuuttumit periarfissinneqartut erseqqissassallugu pingaaruteqarpoq, takuuk Naartunermi, erninermi meeravissiaartaarnermilu sulinngiffeqartarneq pillugu Inatsisartut inatsisaat § 40, imm. 1, nr. 2 aamma nr. 3 kiisalu § 41.

Angajoqqaat naartunermut, erninermut meeravissiaartaarnermullu atatillugu sulinermit isertitassaraluanik annaasaqartarnerannut naapertuuttumik taarsiiffigineqartarnissaasa qulakkeernissaa erninermusiaqarnerup siunertaraa. Taarsiissutit isertitaviusunut annaasat naapertuuttuunissaat qulakkeerniarlugu, suliffilinnut suliffeqanngitsunullu ikiorsiissutit tunniunneqartartut assigiinngissuseqartarput.

Siunnersuutip siunertaraa sulinermit piunasaqaatit pioreersut atorunnaarsissallugit, tassa imaappoq anaanaasut tamarmik sulisimagaluarunik sulisimanngikkaluarunilluunniit ikiorsiissutit assigiinnik tapisiaqartalissapput.

Allannguinnissamut siunnersuutigineqartoq, inatsisilerinikkut aningaasaqarnikkullu eqqarsaatigineqarsinnaasunik pilersitsisoq Naalakkersuisut nalilerpaat.

Qulaniittuut tunngavigalugit tamaasilluta tullinnguuttut allannguutissatut siunnersuutigerusuppavut:

Naartunermut, erninermut meeravissartaarnermullu atatillugu sulinngiffeqarnissamut tunniunneqarsimasumut atugassarititaasut, aningaasaqarnikkut atugassarititaasut ilanngullugit, pitsanngorsarnissaannut inatsisilerinikkut aningaasaqarnikkullu periarfissanik 2026-imi naammassisussamik Naalakkersuisut misissuillutik aallartitsinissaannik peqquneqassasut pillugu Inatsisartut aalajangiiffigisassaattut siunnersuut. Erninermut atatillugu sulinngiffeqartarnermut inatsisip atuuttup kukkunersiorneqarnissaa alloriarneq tulliussasoq siunertaralugu misissuineq UKA 2027-imi naammassineqassaaq.

Siunnersuut matumuuna Inatsisartuni oqaluuserisassanngortipparput.

